



ATASSUT

UPA14/60-1

Knud Kristiansen

15.05.2014

Aatsitassanut ilinniarfiup Nunatta kujasissortaani immikkoortorta qarfeqalersinnaanera pillugu Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Knud Kristiansen og Gerhardt Petersen, Atassut)

Periarfissanik misissuisoqangippat ineriartorneq eqartumik ingerlassaaq, suliassanik siammarterinissamut piumassuseqartoqangippat nunatsinni aaqqissuussaanerput eqiterinermik aallaaveqassaaq.

ATASSUT-mit kissaatigaarput nunatta immikkoortuini sutigut tamatigut ineriartortitsisoqassasoq, aamma ilinniartitaanikkut periarfissat eqqarsaatigalugit, taamaammat sapiissuseqarluta periarfissanik misissuinissarput piumassuseqarfigisariaqarparput.

ATASSUT-mit naammagiinnarusunngilarput periarfissanik misissueqqaarnani aningaasarpasuit atorneqarnissaannik aarlerisaaraluni isumassarsianik qamiteriinnartarnissaq, taamaammat matumani siunnersuutitsinnut Naalakkersuisut tunuarsimaarnerat uniffigiinnarusunngilarput, isumaqarluinnarpugummi ilinniartitaanerit ataqatigiissaagaaneri innarlinngikkaluarlugit siammarterisinnaaneq pimoorullugu misissorneqartariaqartoq.

Assersuutigiinnarlugu piukkunnarsarnerit piginnaangorsarnerillu ilinniakkat aallutilivinnissaat sioqqullugit ullumikkut ilinniarsimassutsitta killiffiani pisariaqarluinnartuusut paasereernikuuvarput, aatsitassarsiornerup iluani sulilerniaraanni qaffasissumik ilinniarsimanngikkaluaaraanniluunniit tuluttut oqalussinnaaneq piumasaqaataasoq ilisimaneqarpoq, pingaartumik oqaatsit sillimaniarnermut upalungaarsimanermullu tunngassuteqartut eqqarsaatigalugit.



Immikkut ilinniarfissuarnik akisoorsuarnik nukippassuarnillu pisariaqartitsisunik pilersitsinngikkaluarluni aatsitassarsiornerup iluani suleqataalerumasunut tunngaviusumik sumiiffinni nukiit ilinniartitsivissallu pioreersut atorluarneqarnerisigut aatsitassarsiornermik ilinniarfiup immikkoortortaqalersinnaanera ATASSUT-mit upperaarpud taamaammallu periarfissanik misissueqqusivugut.

Eqqaamaneqartariaqarpoq inuusuttorpasuit ilinniagaqarsimanatik suliffissaaleqinermik eqqugaasimasut ingerlariaqqinnissaannut kaammattorlugillu tapersorsorneqartariaqarmata, aamma eqqaamaneqartariaqarpoq pingaartilluinnagassatta ilagimmassuk aatsitassat pinnersaasiassallu nunatta tunniussinnaasai nunatta inuinit annerpaamik iluaqutissanngorlugit ineriartortitsinissaq pingaaruteqarmat.

Taamaammatt uuliasiorfissuarni aatsitassarsiorfissuarnilu sulisussat ilinniartinneqarnerat kisimi eqqarsaatigisassaangilaq, aammali nammineq suliffeqarfeerannualiornissamut piginnaanngorsaasoqarluarneratigut nunatsinni innuttaasut nunatta pisuussutaannik atuillutik qanoq inerisaasinnaanerannik ilinniartitsinerit ingerlasinnaammata.

ATASSUT-mit neriuutigaarpud siunnersuuterput manna Inatsisartunit ilassilluarneqassasoq, imaassinnaammammi nunatta kujasissortaani aatsitassarsiornermut ilinniarfiup immikkoortortaqalersinnaanerannik misissuinerup ersersikkaa sumiiffinni amerlanerusuni tunngaviusumik ilinniartitaanerit ingerlanneqarsinnaaneratt aamma periarfissaassasoq.

Taamatut oqaaseqaateqarluta ATASSUT-mit inassutigissavarput siunnersuut akuersaarneqassasoq.